

**II 2 IBIGO, AMASHYIRAHAMWE, N'IMIRYANGO Y'URUBYIRUKO
TWASUYE MURI TANZANIYA.**

1. Urugendo twakoreye muri UMATI

Ni Ikigo gishinzwe imibereho myiza y'abaturage, twakigeranya na ONAPO yo mu Rwanda .Usibye imirimo yo kwigisha abanya Tanzaniya uko bagomba kuringaniza imbyaro n'umusaruro, kurya neza no kurera neza abo babyaye icyo Kigo gikorera muri Minisiteri ya kazi na Maendeleo ya Vijana gifasha urubyiruko muri ibi bikurikira :

- Kubaka ibigo birera impfubyi
- Kubaka no gushyigikira ibigo byita ku bakobwa bahohotewe ndetse bakita no kubatwaye inda bakiri bato.
- gushyiraho no gutera inkunga Ibigo byigisha umuco, imikino y'ubwoko bwose imyidagaduro, n'ibindi...
- Bita ku bana b'inzererezi(mayibobo) akaba ari bo babasubiza mu buzima busanzwe.

Twasuye bimwe mu bigo byabo ,kimwe kikaba kikererwamo bamwe mu bakobwa bafashwe ku ngufu ,abatewe amada bakiri bato,baharerera abana bato biga mu kibura mwaka,bahugura urubyiruko mu myuga icirirtse,kandi abaharangije bakabatera inkunga ibafasha gukora imishinga ibyara inyungu.Banahigishiriza kandi uburyo bwo kwirinda icyorezo cya Sida(Ukimwi) n'ibindi byose birebana n'ubuzima bw'imyororokere. Urubyiruko rukorera muri icyo Kigo ahanini rukora mu bwitange bahereye ku misanzu y'abanyamuryango, bagashaka inkunga babifashijwemo na **Umati**. Batangiye kuvura zimwe mu ndwara zoroheje ndetse bakanashishikariza bagenzi babo kwipimisha ku bushake kugira ngo bamenye aho bahagaze.

Nyuma yo gusura icyo kigo twasuye Dogodogo Center ikigo cyakirirwamo abana b'inzerezi dukunze kwita ba mayibobo .Umati rero ikaba yarashyizeho serivisi ishinzwe kubashaka aho bari hose ikabazana mu kigo aho babanza kubahugura muri ideologie, morale, bakabagaburira barara hamwe n'abo baba bahasanze. Nyuma y'igihe gito bamwe muri bo bumva ko bagomba gusubira mu ngo zabo kubafite ababyeyi, abadafite aho bajya Umati irabakomeza ikabahugura mu myuga icirirtse, abari mu kigero cyo kwiga bagashyirwa mu mashuri hakurikijwe imyaka bari bagezemo. Absigaye aho bose bakomeza guhugurwa mu bijyanye n'uburere mboneragihugu, kugeza igihe nabo ubwabo bagaragarije ko bifuza kuva mu Kigo bakajya mu buzima bagiramo ubwigenge busesuye.

2 Uruzinduko muri Univerisite Nkuru ya Dar es salaam

Muri Univerisite Nkuru ya Dar es Salaam twahasuye tugamije kubereka no kubasobanurira aho u Rwanda rugeze mu rugamba rwo kwisana, nyuma y'amarorerwa yarugwiriye, akozwe n'abanyarwanda ubwabo (cyane cyane urubyiruko). Usibye ibyo kandi, twabasobanuriye ukuntu rumwe mu rubyiruko rw'u Rwanda rwagize uruhare mu guhagarika Itsembatsema n'Itsembabwoko kandi rukaba rwariyemeje gukomeza kurengera ubusugire bw'igihugu no gutanga imbaraga zarwo mu kubaka igihugu.Twabasobanuriye uko Leta y'u Rwanda yitaye ku rubyiruko no ku bari n'abategarugori zo mbaraga z'igihugu, twanabasobanurira uko inzego zagiye zitorwa, uko urubyiruko ruri mu mashuri ndetse no mu buzima busanzwe ruhagaze, tunaboneraho kubasaba ko badufasha kwinjira mu nzego z'urubyiruko rw'Umuryango w'Ibihugu by'Afrika y'Iburasirazuba.

Muri Universite ya Dar es Salaam twaganiriye na komite ihagarariye urubyiruko rwa **Panafrican youth Movement**, tunaganira n'abayobora umuryango w'abanyeshuri, abarimu, ndetse tunabonana n'abashinzwe ibibazo by'impunzi z'abanyeshuri ziga aho i Dar es Salaam.

Twashoboye kugirana ikiganiro na Professor RUAITAMA wigisha aho i Dar es Salaam akaba n'umwe mu bakuriye Panafrican Movement muri Tanzania, ni nawe wafashije urubyiruko gushinga Panafrican Youth Movement. Izo komite zose zadusobanuriye ibikorwa zikora bigamije guhuriza urubyiruko rwa Tanzania mu bikorwa byarufasha gukomeza ubumwe basigiwe na Muzehe NYERERE, kandi bakaba bari muri komite itegura ishyirwaho ry'Inama Nkuru y'Urubyiruko rwa Tanzania.

Abo banyeshuri kandi nanone twafatanyije nabo ndetse n'abanyamakuru biga aho i Dar es Salaam, tugirana ikiganiro cyabereye muri Ambassade y'u Rwanda i Dar es Salaam, bashobora kuganira na Delegation y'u Rwanda, Ambassadeur w'u Rwanda ndetse n'abamwungirije. Ni muri icyo kiganiro rero bemeye ku mugaragaro kuzadutera inkunga bashyigikira icyifuzo cyacu cy'uko Inama Nkuru y'urubyiruko y'u Rwanda yakwinjizwa mu nzego z'urubyiruko rwa Est African Community,cyane ko bafitemo ijambo kandi n'iyo nama ikazabera Arusha muri Tanzania. Kuri iyo ngingo rero hazabaho kugeza ku nzego zishinzwe gushyiraho ihuriro ry'urubyiruko rw'Africa y'Iburasirazuba hakiri kare icyifuzo cyacu kandi bigakorwa mbere y'ukwezi kwa 11 (Ugushyingo), ibyo byazakorwa binyujijwe mu cyumweru cyahariwe urubyiruko muri Tanzania (9-15/10/2000). Hagomba kwigwa ingamba zadufasha kubyumvisha Inama nkuru y'Urubyiruko ya Uganda

ndetse n'iya Kenya, aho muri Kenya tukazabinyuza ku buyobozi bwa Kenya Youth Fundation dufitanye umubano nyuma y'inama twahuriyemo mu Budage muri Nyakanga uyu mwaka.

3 Uruzinduko muri AMREF

Ni ikigo kigamije kwigisha abanya Tanzaniya muri Rusange mu bijyanye n'ubuzima kikaba gifite ibigo bifasha urubyiruko rw'ingeri zose kandi mu turere twinshi twa Tanzaniya.

Twashoboye gusura icyitwa UMOJA-CLUB kiri ahitwa KINONDONI, kikaba cyigisha urubyiruko rwo muri ako karere imyuga iciriritse, ubuzima bw'imyororokere, kwirinda icyorezo cya SIDA, bashishikariza urubyiruko kwipimisha ku bushake kandi bakagira inama abanduye agakoko ka SIDA.

Muri icyo Kigo kandi bafite ubibuga by'imipira y'intoki ndetse n'inzu mbera byombi ; bikaba byarubatswe ku bufatanye bw'urubyiruko n'ababyeyi baturiye icyo kigo bakusanyije imisanzu hanyuma bitabaza AMREF. Iyo nzu mberabyombi n'ibyo bibuga bibafasha kwongera umutungo bakabona n'aho bakorera ibikorwa bigamije kurwanya SIDA (ibiganiro), hakaba hakoranira amakoraniro manini y'urubyiruko, hagakusanyirizwa imisanzu yo gutera inkunga ibikorwa by'urubyiruko. Habera n'amahugurwa agamije kwigisha urubyiruko imishinga ibyara inyungu. Ibikorwa byinshi bikorerwa aho, ahanini binyuzwa mu mikino, imyidagaduro, ubuhamya,ibiganiro mpaka n'ibiganiro mbwirwa ruhame.

4 SHDEPHA (Service Health and Development for People Living with HIV/AIDS)

Mu rwego rwo kurwanya icyorezo cya SIDA, hari uburyo bwinshi bukoreshwa, ariko ubwo twabonye Tanzaniya bwo ni bumwe mu bwo twafataho urugero.Twari tumenyereye ko abigisha uko SIDA yakwirindwa ari abagikeka ko ari bazima cyangwa abafite imyanya mu buyobozi runaka.

Naho ikigo Shepha kirimo urubyiruko ndetse n'abantu bakuze bipimishije bakaba baranduye SIDA noneho bagahitamo gufata iya mbere ngo bashishikarize abatari bandura kwirinda inzira zose bakwanduriramo.

Shdepha yatangiye taliki 6/9/93' ribona ubuzima gatozi kuwa 21/11/1994 n'itegeko nimo S08216 bafite abanyamuryango(members ship active)861 bakagiraamashami 13 mu gihugu hose n'icyicaro kiri i Dar es Salaam.gifite ibikoresho n'uburyo buhagije.

Bafite n'ibikorwa byinshi byo gutera inkunga no gufata mu mugongo abanduye agakoko ka SIDA nko kubaha akazi, kubaha imiti yorohereza abarwayi, kubashakira ibiryo byabafasha kubaho ige cyigiye imbere.

Bakoresha ibiganiro mbwirwaruhame ku bibuga bagahuruza imbagaya urubyiruko, bakababwira ibyo bagomba kwitwararika ho!. Bakora ibitabo n'utundi dupapuro (Dépliants) byo gukwirakwiza mu bantu bakabyifashisha mu kwiugura no kumenya imyitwarire ikwiye kugira ngo birindeSIDA, ndetse bakanashyiramo uburyo n'imibereho bigomba kuranga uwanduye SIDA, indyo ,imiti n' ibindi bikenerwa n'umurwayi wa SIDA. Uwo muryango Shdepha wo ugizwe n'abantu banduye SIDA bipimishije inshuro eshatu bakaba baragaragaje koko ko banduye SIDA. Baterwa inkunga na ONUSIDA(UNIDS Technical working group), Leta ibinyujije kuri UMATI na Minisiteri y'Ubuzima,Natinal Advisor Board National AIDS Committee.....

Twasanze rero abantu nka bariya bafitiye runini igihugu kandi no mu Rwanda, tukaba twumva bigomba kubaho kuko difite abantu benshi banduye bashobora gushyirwa hamwe, bakaba batanga umuganda wabo batanga ubuhamya, bikanabafasha kubona akazi kababeshaho.

5 UVU KIUTA :

Ni ikigo cy'urubyiruko cy'intangarugero cyatangiye hashize imyaka 12 Abasore n'inkumi bagera kuri 12,bishyize hamwe maze biha gahunda yo guhugura abandi mu bijyanye n'urukundo, kwitabira umurimo, ubukorikori, ubuhinzi, ubworozzi, guhugura abashaka kurushinga ndetse bagatanga n'imyitozo yindi ngororangingo, imyidagaduro n'ibindi.

Batangiye nta nkunga bafite,nyuma abayobozi babonaga ibyo bakora birabatangaza, nibwo baje gusurwa na Minisitiri wari ufite urubyiruko mu nshingano ze abemerera kububakira inzu yo gukoreramo yaguye kuko ako batangiriyemo kageraga aho kakababera gato bikaba ngombwa ko baca amahema iyo babaga bakiriye urubyiruko rwinshi.

Kuva icyo gihe rero batangije ibikorwa bibyara umusaruro :

- *ubuhinzi bw'indabo n'ibindi by'umurimbo bahuguwemo na madamu HAJABAKIGA Patricia (babicuruza mu mugi)
- *Ubworozi bw'amitungo maremare
- *Guhugura abantu ku ikoreshwa rya bio-gaz akaba ari nayo bakoresha ku bintu byose bikenera ingufu z'umuriro mu kigo cyabo babyigishijwe na Dr Butera (KIST)
- *Ubuhinzi bw'imbuto no kuzitunganya bakavanamo imitobe.
- *Bapatana gutunganya ubusitani bw'amazu yaba aya Leta cg ayabikorera ku gitii cyabo
- *Itorero rikomeye ryakira abayobozi iyo hari ibirori.

Aho ibikorwa byabo bitangiriye kwamamara bakanabarwa muri imwe mu miryango y'urubyiruko yemewe muri Tanzaniya, Perezida NYERERE na MWINYI barabasuye umwe mu gihe cye babemerera kububakira ishuri ryo guhugura urubyiruko rifite n'ibikoresho by'ibanze byose ubu ryaruzuye, babemereye kandi n'isambu ya ha 100 yo gukoreramo imirimo yabo yose, bakaba bamaze gutegura igishushanyo mbonera cy'umudugudu wa kijyambere w'urubyiruko bateganya kubaka amazu y'abashaka ku rushinga bakajya bayabamo nyuma y'imyaka itanu bakorana nta mushahara nkuko abatangiyé umuryango bagenda babigenza.

Abo basore n'inkumi baba muri UVIKIUTA bafite umwihariko wo gutera inkunga abashaka kurushinga, kuburyo umunyamuryango wabo ufite uwo mushinga bamwubakira kandi yamara kurongora cg kurongorwa bakamuha inka yo kumufasha mu buzima bushya aba yinjiye mo.

Muri icyo kigo bahakorera, ingando z'ubusabane ubufatanye ndetse n'izumusaruro ;habera amahuriro y'urubyiruko ruba rwaturutse mu mpande zose za Tanzaniya, bakaba bafite n 'itorero riri muyitabazwa iyo hari ibirori bikomeye mu gihugu.

6 URUZINDUKO MURI EMAU,WAMATA DON BOSCO N'ABASKUTI

Nyuma yo gusura biriya bigo byamaze kuvugwa haruguru twasuye ku buryo burambuye Emau ikigo mu by'ukuri gifite amateka maremare gifasha urubyiruko ahanini mu bijyanye n'ubuzima bwa gikirisitu imibereho, ubuzima bw'imyororokere ,babatoza uko bazitwara bamaze gushinga ingon'ibindi.....

EMAU ifite ibigo by'amashuri abanza,n'ayisumbuye hirya no hino muri Tanzaniya ikagira ibigo byigisha urubyiruko imyuga iciriritse

WAMATA yo ni kimwe na SHDEPHA+,ni umuryango uhuriwemo n'abantu banduye agakoko ka SIDAndetse n'abandi biyemeje kubafasha mu rugamba rwo kurwanya SIDA hakoreshejwe ubuhamya bw'abanduye. Uwo muryango kandi wita no ku mpfubyi zasizwe n'abishwe n'ako gakoko. Bafite urubyiruko rwinshi bakorana narwo mu mashuri mu matoreron'ahandi.

DON BOSCO ni ikigo CY'ABAFLURE B'ABASARIZIYANI bafite gahunda ndende zo gufasha urubyiruko babahugura mu myuga iciriritse ,bafite amashuri abanza n'ayisumbuye hirya no hino muri Tanzaniya ,bafite gahunda zo gukora amakipe y'umupira y'ingeri zose kwigisha imikino ngorora ngingo ama ORQUESTRES n'ibindi ubona bishimishije

ABASKUTI .Abaskuti ba Tanzaniya bafite gahunda nyinshi mu rubyiruko rwaho bafite ibigobihugura mu myuga iciriritse,bigisha uburere mbonera gihugu uwirinzi ,bagakora n'ibikorwa byinshi mu butabazi haba mu baturage ndetse no mu nkambi z'impunzi batanga ibiryo ,akaba aribo bashinzwe Centre de Transit mu nkambi z'impunzi z'Abanyarwanda ziri mu burasira zuba bwa Tanzaniya.

**II 3 1 IBIGANIRO TWAGIRANYE N'ABANYAMAKURU BA
TANZANIYA**

Mbere yo gusoza uruzinduko twagiriye mu gihugu cya Tanzaniya, byabaye ngombwa gukorwsha ikiganiro mbvirwaruhame kuri Ambasade y'u Rwanda i Dar-es-Salaam, kikaba cyaritabiriwe n'abanyamakuru bandika mu binyamakuru bya Leta n'ibygenga ndetse n'abakora kuri Televiziyo ya Leta n'izigenga zikorera mu mugi wa Dar-es-Salaam na Zanzibar. Icyo kiganiro kikaba cyarafunguwe ku mugaragaro n'Ambasaderi w'u Rwanda Nyakubahwa MUTANGUHA Zefaniya, ari kumwe n'Umuyobozi Mukuru w'Urubyiruko muri Minisiteri y'Umurimo n'Iterambere ry'Urubyiruko muri Tanzaniya.

Ambasaderi MUTANGUHA atangiza ikiganiro yasobanuriye abanyamakuru ba Tanzaniya Politiki ya Leta ku rubyiruko rw'u Rwanda, anabamenyesha ko uruzinduko rw'abaje bahagarariye Inama Nkuru y'Urubyiruko rw'u Rwanda, ari kimwe mu bimenyetso bigaragaza ko Leta y'Ubumwe yahaye urubyiruko ijambo n'uburenganzira ku micungire y'igihugu ndetse rukaba rufite n'uburenganzira bwo gushaka inshuti haba imbere mu gihugu cyangwa no mu mahanga mu migambi yose igamije guteza imbere akarere dutuyemo muri rusange, n'u Rwanda ku bw'umwihariko. Yakomeje ababwira ko imiryango y'Ambasade y'u Rwanda ifunguye, kandi ko uwakwifusa kugira icyo amenya ku gihugu cyacu yajya ayigana atishisha bikabafasha kujya bandika inkuru nyazo aho guhora bitiranya u Rwanda n'u Burundi.

Yarangije asaba uhagarariye intumwa z'Inama Nkuru y'Urubyiruko gusobanurira abanyamakuru ba Tanzaniya impamvu z'uruzinduko rwabo mu magambo arambuye, ndetse amuha n'uburenganzira bwo gutanga ibisobanuro ku bibazo by'abanyamakuru.

Uhagarariye intumwa z'u Rwanda, Bwana GATABAZI J.M.Vianney, yamenyesheje abanyamakuru bari aho impamvu nyamukuru zabahagurukije mu Rwanda, ahanini zijiyanje no gukurikirana ishyirwa mu bikorwa ry'imyanzuro y'Inama Mpuzamahanga y'Urubyiruko yabereye i Kigali m'Ugushyingo 1999. Abasobanurira amavu n'amavuko y'ishyirwaho ry'inzego z'urubyiruko mu Rwanda, imibereho y'urubyiruko n'ibimaze gukorwa kuva Inama Nkuru y'Urubyiruko yajyaho.

Ibibazo byabajijwe n'abanyamakuru, ahanini byibanze kuri politiki ya Leta y'Ubumwe, ku mibereho y'abahungutse bava muri Tanzaniya n'ahandi baba aba 59 ndetse 94, ku bibazo by'ubutabera n'imfungwa, k'umubano w'u Rwanda na Uganda nyuma y'ibibazo ingabo z'ibihugu byombi zagiranye i

Kisangani muri Kongo, banifuje ibisobanuro bijyanye n'impamvu zagiye zituma bamwe mu bayobozi bakuru begura ndetse bamwe bagahitamo gufata iy'ubuhungiro.

Visi Perezida w'Inama Nkuru y'Urubyiruko yunganiwe na bagenzi be, basobanuye ikibazo ku kindi ku bibazo byari byabajijwe ku buryo abanyamakuru ba Tanzaniya banyuzwe, banashimishwa n'uko ibisubizo bahawe bisa n'ibyo bari baragiye bahabwa n'Ambasaderi w'u Rwanda igihe cyose habaga habaye impinduka muri politiki y'u Rwanda.

Ikindi cyarushijeho kubashimisha n'uko ibisubizo babihawe n'abantu batowe n'abanyarwanda ubwabo, bavuye mu Rwanda kandi bakaba bizera ko ubutumwa batanze nabwo buzagera ku banyarwanda benshi.

II 3 2BIMWE MU BYIFUZO BYAGARAGAJWE N'ABANYATANZANIYA

Baba abayobozi ba Minisiteri y'Urubyiruko, baba Urubyiruko twasuye mu Bigo binyuranye, baba abanyeshuri n'abrimu ba Universite Nkuru ya Dar es Salaam, baba Abanyamakuru ndetse n'abandi twagiye tuganira nabo bashimye intambwe u Rwanda rugezeho nyuma y'amarorerwa yarugwiriye, banashima by'umwihariko ibimaze kugerwaho n'urubyiruko rw'u Rwanda. Abo bose bakaba barifuje ko urubyiruko rw'u Rwanda rwagirana umubano wihariye n'urwa Tanzaniya kandi rukazagira uruhare mu gufasha Tanzaniya gushyiraho inzego z'urubyiruko no kuzihugura.

Minisiteri y'Urubyiruko ya Tanzaniya yasabye ko Inama Nkuru y'Urubyiruko rw'u Rwanda yazitabira icyumweru cyahariwe urubyiruko muri Tanzaniya giteganyijwe kuva tariki ya 9-15 Ukwakira 2000, akaba ari mur'icyo cyumweru hazashyirwaho gahunda y'amatora y'inzego z'urubyiruko muri Tanzaniya ndetse n'ishyirwaho ry'ihuriro ry'urubyiruko rwa Est African Community.

II 3 3 IKIGANIRO N'UMURYANGO W'ABANYARWANDA BABA MU MUJYI WA DAR ES SALAAM NO MU NKENERO ZAWO

Ku munsi wa nyuma w'uruzinduko muri Tanzaniya, Intumwa z'inama Nkuru y'Urubyiruko zagiranye ikiganiro n'abahagarariye abanyarwanda baba mu mugi wa Dar es Salaam no mu nkenero zawo kikaba cyarafunguwe ku mugaragaro n'Ambasaderi.

Visi Perezida w'Inama Nkuru y'Urubyiruko wari uyoboye izo ntumwa, yasobanuriye abo banyarwanda ko igihe cyose bazaba biyumvamo ko ari

abanyarwanda bagomba guhora bashishikajwe n'icyateza imbere igihugu cyabo, bagahora bumva ko ibibazo u Rwanda rufite n'ibyo rwazahura nabyo mu bihe bizaza, bagomba kugaragaza uruhare rwabo mu kubikemura aho kwigira ba ntibindeba bakabiharira abari imbere mu gihugu gusa.

Yabasabye guhora bashishikajwe no gusobanura ku buryo nyabwo ibibazo u Rwanda rugenda ruhura nabyo, kandi bakarangwa no kugendera ku mahame remezo ya politiki ya Leta y'Ubumwe bakegera abanyarwanda bakomeje kunangirira muri Tanzaniya bakabahumuriza, bakanabafasha mu bishoboka byose byatuma bataha mu gihugu cyabo.

Abo banyarwanda bishimiye ibimaze kugerwaho n'urubyiruko rw'u Rwanda, bemera ko ibyo basabwe bazabishyira mu bikorwa, kandi ko bazakomeza gufatanya n'abanyatanzaniya muri gahunda yo kubaka inzego z'urubyiruko barushaho gushyigikira gahunda zose zatuma umubano w'ibihugu byacu ukomeza kuba mwiza.

Bashimye cyane uburyo amatora y'urubyiruko yagenze mu Rwanda, bigaragaza ko urubyiruko rwarenze amacakubiri, kuko basanze ayo matora atarabayemo uburiganya cyangwa ivangura iringo ariryo ryose.

III UMWANZURO

Uruzinduko muri Tanzaniya rwagenze neza kuko twashoboye gusura ibigo n'imirynago itera inkunga urubyiruko, dushobora kwibonera uko urubyiruko rwa Tanzaniya rugerageza kwiyubaka, kandi dushobora kubona n'urubuga rwo kubagezaho uko urubyiruko rw'u Rwanda ruhagaze.

Mu guzosa iyi raporo, tukaba twifuza ko ibi bikurikira byazashyirwa mu bikorwa kugira ngo uruzinduko rutaba rwarapfuye ubusa :

- Mu rwego rwo gufasha urubyiruko rwa Tanzaniya kwiyubakira inzego, no kwiteganyiriza kugirana narwo umubano wihariye nk'ighugu u Rwanda runyuzamo byinshi mubyo ruhaha mu mahanga, byaba byiza ubutumire bwabo bwubahirijwe.
- Mu rwego rwo kumenyekanisha ibikorerwa mu Rwanda ku buryo bw'ivaho, abanyatanzaniya bifuje ko habaho ikinyamakuru cyanditse mu giswahili kikajya cyoherezwa muri Tanzaniya kinyujijwe muri Ambasade cyangwa ku bundi buryo bwose bwashoboka.
- Urubyiruko rwa Tanzaniya rwifuje ko mu ruzinduko rutaha rwazafatanya n'abazaba bahagarariye u Rwanda gusura impunzi z'abanyarwanda zanze

gutaha bakazisobanurira uko u Rwanda ruhagaze kuko byagaragaye ko zikigendera ku bihuha,zikabeshya ubutegetsi bwa Tanzaniya nazo zitiretse.

- Haramutse habonetse uburyo, Minisiteri y'Urubyiruko yasabwe kuzategura imikino inyuranye (umupira w'amaguru, uw'intoki, amatorero, ...) byakorerwa muri Tanzaniya mugihe nibura cy'icyumweru.
- Kubyerkeye icyorezo cya SIDA hakenewe ko amashyirahamwe y'abarwayi ba SIDA yaterwa inkunga na MIJESPOC ONUSIDA CNJR(PSJR) PNLS Minisante bakohereza Intumwa zigasura kuburyo bw'umwihariko Amashyirahamwe y'abarwayi ba Sida muri Tanzaniya bakareba niba uburyo bakoresheje bwahuzwa n'ubwo bakoresha bikabafasha kurangiza gahunda bafite bukanafasha Leta guhyiraho gahunda ihamye yo kwita ku barwayi ba SIDA.

IBIRIMO

I Intangiriro

II Icyo urugendo rwari rugamije

II 1 Intumwa zoherejwe muri Tanzaniya.

II 2 Ibigo n'izindi nzego zasuwe muri Tanzaniya

Minisiteri y'urubyiruko.

Ibigo n'amashyirahamwe y'urubyiruko

*II 3 1 Ibiganiro twagiranye n'Abanyamakuru ba Leta ndetse
n'Abigenga.*

2 Ibyifuzo by'Abanyatanzaniya.

*3 Ikiganiro n'Abanyarwanda baba i Dar es Salaam no
mu nkengero zayo*

III Umwanzuro